

近代中國史料叢刊第六輯

沈雲龍主編

求闕齋弟子記

王定安撰

文海出版社印行

求 闕 齋
弟 子 記

李鴻章謹署



光緒二年
刊於都門

板存琉璃廠東門
桶子胡同龍文齋

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



求闕齋弟子記目錄

卷一

恩遇上

卷二

恩遇下

卷三

忠讜

卷四

平寇一

自道光三十年廣西
倡亂起至咸豐四年

卷五

平寇一 自咸豐五年
至咸豐七年

卷六

平寇二 自咸豐八年
至咸豐十年

卷七

平寇四 自咸豐十一年
至同治元年

卷八

平寇五 同治
二年

卷九

平寇六 自同治三年
正月至九月

卷十

平寇七

自同治三年十月至同治四年十二月
嘉應州滅賊止 附賊酋名號譜

卷十一

剿捻上

自同治四年五月湘淮
軍剿捻起至十二月

卷十二

剿捻中

同治
五年

卷十三

剿捻下

自同治六年至同治
七年六月平捻止

卷十四

撫降

李世忠事

卷十五

馭練 苗沛霖事

卷十六

綏柔上 自咸豐十年十月至同治七年九月

卷十七

綏柔中 同治九年天津教案

卷十八

綏柔下 自同治九年十一月至十年九月止 附論洋務書牘

卷十九

志操上

卷二十

志操下

卷二十一

文學上 經 子 史

卷二十二

文學下 文 書法 碑帖 名畫 書籍

卷二十三

軍謨上 論兵法 論將 論近時名將 論計賊 論剿

土匪 營壘 礮堡 火器 木牌 砲船 馬隊
報銷 古今兵事得失
得勝歌 平安歌

卷二十四

軍謨下 行營章程 勸誠營官 營制 馬隊營制章程
營規 營官陣法 長江水師章程 江蘇水

師直
隸練軍

卷二十五

家訓上 諭二子

卷二十六

家訓下 諭諸弟

卷二十七

吏治一 官常

卷二十八

吏治二 江蘇漕政 海運章程
河運章程 江西漕政

卷二十九

吏治三 兩淮鹽政

卷三十

吏治四 茶課 河工 屯田 荒政 湖團

卷三十一

哀榮上 列傳 奏疏 碑誌

卷三十二

哀榮下 祭文 祠堂 詩

求闕齋弟子記目錄

求闕齋弟子記卷一

東湖王定安撰

恩遇上

皇贈太傅累授光祿大夫武英殿大學士兩江總督一等毅勇

侯諡文正曾公諱國藩字滌生

原名子城字伯涵登第後始改今名

湖南長沙府

湘鄉縣人先世或云系出曾子十五世孫據爲漢關內侯避王莽之難南遷爲南州諸曾之祖元代諸曾自江西遷衡陽世居廟山習農業歷明迄

本朝無顯者順治間有名孟學者始遷湘鄉荷塘都之大界里

再傳至應貞字元吉

定安撰曾文正公事畧云孟學生元吉按公撰元吉公墓銘曰公諱應貞字元吉遷

三
湘四世祖也又大界墓表曰先六世祖曰孟學初遷湘鄉者也
會祖曰元吉別立祀典者也是元吉乃孟學之孫非其子也今
改徒手致千金家始裕應貞有子六人次曰輔臣公之高祖也
正按元吉公墓銘云子六人長楚材次輔臣次文炳次明
德次兼山次容若國藩乃公次子輔臣公之元孫也輔臣生
竟希字儒勝

誥贈光祿大夫如公官妣彭氏

誥贈一品夫人竟希生玉屏字星岡是爲公王父初

封中憲大夫累

贈光祿大夫如公官妣王氏初

封恭人累

贈一品夫人玉屏威儀雄偉言論侃侃聲若洪鐘鄉里見者輒

憚懾然無奇遇重事以發其意自念曾氏世農五六百年無以
學業發名者乃講求禮制賓接文士溫良博愛恂恂焉以不學
爲恥嘗語人曰吾少耽游惰往還湘潭市肆與裘馬少年相逐
或日高酣寢長老有譏以浮薄將覆其家者余聞而立起自責
貨馬徒行自是終身未明而起余年三十五始講求農事居枕
高嶺山下壠峻如梯田小如瓦吾鑿石決壤開十數畝而通爲
一然後耕夫易於從事吾昕宵行水聽蟲鳥鳴聲以知節候觀
露上禾顛以爲樂種蔬半畦晨而耘吾任之夕而糞保任之
入而飡豕出而養魚彼此雜職之凡菜茹手植而手顛者其味
彌甘凡物親歷艱苦而得者食之彌安也吾宗自元明居衡陽

之廟山久無祠宇。吾謀之宗族諸老，建立祠堂，歲以十月致祭。自

國初遷居湘鄉，至吾曾祖元吉公，基業始宏。吾又謀之宗族，別立祀典，歲以三月致祭。世人禮神微福，求諸幽遐，吾以爲神之陟降，莫親於祖考，故獨隆於生我一本之祀。而他祀姑闕焉。後世雖貧，禮不可墮。子孫雖愚，家祭不可簡也。吾早歲失學，壯而引爲深恥。旣令子姪出就名師，又好賓接文士，候望音塵，常願通材宿儒，接跡吾門。此心乃快。其次老成端士，敬禮不怠。其下汎應羣倫，至於巫醫僧徒，堪輿星命之流，吾屏斥之，惟恐不遠。舊姻窮乏之遇，之惟恐不隆。識者觀一門賓客之雅正，疏數而卜。

家之興敗理無爽者鄉黨戚好吉則賀喪則弔有疾則問人道之常也吾必踐焉必躬焉財不足以及物吾以力助焉鄰里訟爭吾常居閒以解兩家之紛其尤無狀者厲辭詰責勢若霆摧而理如的破悍夫往往神沮或具尊酒通殷勤一笑散去君子居下則排一方之難在上則息萬物之囂其道一耳津梁道途廢壞不治者孤嫠衰疾無告者量吾力之所能隨時圖之不無小補若必待富而後謀則天下終無可成之事矣卒年七十有六其配王太夫人孝恭雍穆自酒漿縫紉以至禮賓承祭經紀百端曲有儀法虔事夫子卑屈已甚時逢愠怒則悚息減食甘受折辱以迴眷睽年逾七十猶檢校內政絲粟不遺其於子婦

孫曾羣從外姻童幼僕姬皆思有惠逮之卒年八十五太夫人生子三人長曰麟書字竹亭初

封中憲大夫累

封光祿大夫

贈大學士兩江總督一等侯爵公之父也仲曰上台早卒季曰

驥雲以公貴

馳封光祿大夫

按台洲墓表云府君有弟二人仲曰上台年二十有四而歿府君視病年餘營治醫藥旁皇達旦季曰驥雲推甘讓善老而

彌恭無子以國華爲之嗣竹亭封翁娶同邑處士江沛霖女

曰江太夫人初

封恭人累

封一品侯夫人生子五人公居長次國潢字澄侯今官鹽運使
銜候選郎中次國華字溫甫官至候選同知

贈道員

子諡愍烈次國荃字沅浦今官太子少保一等威毅伯頭品頂
戴河東河道總督世所稱九帥者也次國葆字季洪更名貞幹
字事恆官至候選知府

贈按察使

子諡靖毅初竹亭封翁積苦力學久困於學政之試徒步橐筆
以干有司年四十三始補縣學生員事星岡公以孝聞星岡公
生平督子最嚴往往稠人廣衆壯聲呵斥或有不快於他人亦

痛繩其子竟日嗚嗚詰數愆尤封翁屏氣負牆蹶蹶徐進愉色如初星岡公晚年病痿痺動止不良又瘖不能言卽有所需以頤俛以目求卽有苦感額而已封翁朝夕奉事常先意而得之夜侍寢處星岡公雅不欲頻煩驚召而他僕殊不稱意前後洩益數一夕六七起封翁時其將起則進器承之少閒又如之聽於無聲不失分寸嚴寒大洩則令他人啟移手足而身翼護之或微沾汗輒滌除易中衣拂動甚微終宵惕息明旦則驥雲入侍奉事一如封翁之法久而諸孫孫婦內外長幼感化訓習爭取垢汗襦袴浣濯爲樂不知其有臭穢或挽篋與遊戲庭中各有常程病凡三載封翁未嘗一日安枕也江太夫人佐封翁理

家政饁爨必躬在視必恪賓祭之儀百方檢飭尺布寸縷皆一手拮据或以人衆家貧爲慮太夫人曰某業讀某業耕某業工賈吾勞於內諸兒勞於外豈憂貧哉每好作自強之言亦或諧語以解劬苦嘉慶辛未年十月十一日亥時太夫人誕公於白陽坪里第是時竟希公年七十矣忽夢有巨物蜿蜒自空而下首屬於梁尾蟠於柱鱗甲森然不敢徧視竟希公驚寤已而聞公生大喜知爲非常器特愛重之少時岐嶷凝重五歲入家塾九歲誦五經畢始爲制藝帖括封翁晨夕講授指畫耳提不達則再詔之已而三覆之或攜諸途呼諸枕重叩其所宿惑必通徹乃已其視他學僮亦然其後教諸少子亦然嘗曰吾固鈍拙

訓告若輩鈍者不以爲煩苦也年十六封翁擊同赴郡縣試列
高等道光十二年湖南學政岳鎮南按臨長沙府歲試取侑生
明年科試補縣學生員十四年甲午科鄉試徐雲端爲湖南正
考官許乃安副之房官張啟庚獲公卷奇之呈主試者中式第
三十六名舉人時年二十四十五年乙未赴禮部會試不第明
年丙申再報罷歸自京師十八年戊戌科會試大學士穆彰阿
爲正考官朱士彥吳文鎔廖鴻荃副之中式第三十八名貢士
卷出季芝昌房

正大光明殿覆試一等

殿試三甲第四十二名

賜同進士出身

朝考入選

定安撰公事畧云宗拔置第一名蓋承年譜之誤耳是科

朝考進呈疑一等第三名

宣

分等第今改正

改翰林院庶吉士八月假歸湘鄉二十年庚子散館列

二等第十九名授檢討九月充順天鄉試磨勘官二十一年十

月充 國史館協修二十三年三月

大考翰詹列二等第一名奉

旨以翰林院侍講升用六月

詔以公爲四川正考官趙楫副之獲士宋文觀等六十二人副

榜十二人七月補翰林院侍講十一月回京覆

命充文淵閣校理二十四年二月侍班於文淵閣觀

經筵大典五月

召見於勤政殿充翰林院教習庶吉士十二月轉補翰林院侍讀二十五年乙巳科會試充第十八房同考官獲士周士炳等十九人五月

上御門并授詹事府右春坊右庶子九月擢翰林院侍講學士召見於勤政殿十月

皇太后萬壽聖節

覃恩誥封兩代如公官十二月充日講起居注官文淵閣直閣事二十六年九月祖妣王大恭人薨十一月訃至京設次成服請假兩月十二月葬王大恭人二十七年四月

大考翰詹列二等第四名奉

旨記名遇缺題奏

賞大卷緞二件六月擢內閣學士兼禮部侍郎銜

召見於勤政殿充考試漢教習閱卷大臣獲士黃文璧等百二十三人七月公弟國荃補縣學生員十月充武會試正總裁又派殿試讀卷大臣武進士楊登魁等六十四人弓矢技勇

上親閱之二十八年七月公弟國荃補廩膳生九月充稽察中書科事務二十九年正月擢禮部右侍郎

召對稱

旨三月十四日值班

召見三十日又

召見每有奏對

上輒嘉賞八月兼署兵部右侍郎充宗室舉人覆試闈卷大臣
九月充順天鄉試覆試闈卷大臣十月充順天武鄉試校射大
臣是月祖考星岡封翁薨訃至京設次成服請假兩月葬星岡
封翁於邑之八斗衝遷王太恭人祔焉三十年正月十四日
宣宗成皇帝升遐遺命毋庸

郊配

廟祔

文宗卽位下廷臣議公具疏謂

廟祔不可易

郊配位次已乏餘地

大行皇帝以身制限俾世世遵行此大孝大讓不可違
上善之

覃恩加一級封贈三代皆榮祿大夫二月內賜

遺念衣一件玉珮一事三月應

詔陳言謂用人有轉移培養考察三端經筵日講爲求治基本
宜加意

優詔獎許四月

宣宗升配覃恩加一級封贈三代皆光祿大夫充會試覆試閱

卷大臣 朝考閱卷大臣五月禮部考試優貢時

詔舉賢才公疏薦李棠階品學純粹宜侍講幄吳廷棟遠識深
謀可當大任王慶雲閎才精識堪膺彊寄嚴正基洞悉民隱才
能濟變江忠源忠義耿耿愛民如子其後多爲名臣如公言六
月兼署工部左侍郎充 朝考拔貢閱卷大臣取士二百餘人
七月公弟國葆補縣學生員八月
召詢工部職務奏對移時充考試國子監學正學錄閱卷大臣
取士五十人九月充

宣宗梓宮前恭捧

冊寶大臣禮畢加二級十月兼署兵部左侍郎是歲廣西盜起

逆酋洪秀全楊秀清等據桂平金田村

詔起林則徐視師卒於道

授李星沅 欽差大臣周天爵廣西巡撫向榮廣西提督

咸豐元年三月公疏言天下大患一在國用不足一在兵伍不

精宜裁汰以節虛糜

召見嘉勉四月上敬陳

聖德十疏預陳三大流弊請防其漸語多切直朝士皆憂其獲
譴及

優詔褒答一時稱盛事焉五月兼署刑部左侍郎八月充順天
鄉試搜檢大臣閏八月大學士琦善因番案逮問下刑部獄執

欽差薩迎阿查辦不實請還其隨員對質刑部尙書恆春領之公曰琦善雖位至將相然既奉

旨查辦司員雖微要亦會訊官也若因此得罪將來大臣有罪誰敢問者必欲傳訊請

旨而後可事乃寢十月充順天武鄉試正考官沈兆霖副之得武舉一百六十六人十月監視

郊壇開工十二月上備陳民間疾苦一疏謂目前急務有三一銀價太低二盜賊太衆三寃獄太多奉

旨交部議奏監視

慕陵隧道開工是歲廣西盜益熾

上命大學士寶尙阿爲 欽差大臣副都統烏蘭泰幫辦軍務
鄒鳴鶴廣西巡撫

咸豐二年正月兼署吏部左侍郎二月隨扈祇謁

慕陵三月疏請寬免勝保處分以廣言路

上嘉納之充王子科會試搜檢大臣又派恭送

太廟冊寶四月

宣宗升配加一級六月

詔以公爲江西正考官疏請俟試竣回籍

硃批允之七月行次安徽太湖縣聞母江太夫人之訃匍匐奔
喪八月抵家九月葬江太夫人時粵匪洪秀全等由廣西竄長

沙圍攻三閱月不克十月解圍去掠船浮洞庭湖而下陷岳州
十一月陷漢陽十二月陷武昌巡撫常大滄等死之大江南北
土匪蜂起

詔諭湖南巡撫張亮基曰丁憂侍郎曾國藩籍隸湘鄉於湖南
地方人情自必熟悉著該撫傳旨令其幫同辦理本省團練搜
查土匪事宜伊必盡心不負委任於是公始治團練於長沙疏
陳練民查匪大概規模且言臣在京供職十有四年今歲歸來
祖父母之墓已有宿草臣母之葬亦未盡禮若遽棄庭闈出而
莅事萬分不忍請俟賊氛稍息團防之事辦有頭緒卽當回籍
守制以遂烏私奉

旨報可是歲饗尙阿逮問

授徐廣縉 欽差大臣武昌旣陷廣縉亦被逮

授向榮 欽差大臣

咸豐三年正月編查保甲設發審局時粵匪洪秀全棄武昌東下疊陷沿江郡縣十七日陷安慶二月初十日陷金陵據爲僞都向榮追師駐金陵城外號江南大營三月

詔駱秉章署湖南巡撫公緝捕會匪誅斬甚衆

上聞而嘉悅

硃諭獎之六月與駱秉章會奏辦理防堵事宜且言母喪初周回籍修小祥禮又會劾副將清德薦參將塔齊布千總諸殿元